



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : Tir Yimyim

tiryimyim@aolima

tir yimyim

TAPAK 3

Netanyahu-i Rafah nungi nūburtem anintsū tetuyuba agūtsūgo

LS election matongdang CAA mapa kūma benoktsū: Amit Shah



VOL. XXI ISSUE NO. 119 (ADOK 119) DIMAPUR AMUNGNÜ (SUNDAY) TSÜKLAI (FEBRUARY) 11, 2024 ₹ 5.00

ASTD, DWT aser DAYO-i metetdaksür

Dimapur, February 10, 2024 (TYO): January 29 nū Moalong Jamir dak tashiyim inyakertem mapang shitak nung mapa nungi anentsūba atema Dimapur Police Commissionerate nem tenūngsang agūtsür ta Ao Senso Telongjem Dimapur (ASTD), Dimapur Watsu Telongjem (DWT) aser Dimapur Ao Lanur Telongjem (DAYO) teloktemi metetdaksūgo.

Parnoki Dimapur Police Commissionerate dang aibelener nem tapet temerenshitsu

agūtsūtsū asoshi shinga tsūtsū tejak meshii bushisūngdang asūtsū mepishia metetdaksūgo.

Telok asemisa tarutsū nung police asoshi standard operating system tajung latetsū, police nem shisatsū agūtsūba den public-i meteta alitsū osangtem prokshitsu ayongzūkogo.

Kaketshir teloktem, CSOs aser telok balalai iba tatalokba atema temeten meshia yariba atema kanga pelar ta ASTD, DWT aser DAYO ajanga metetdaksūgo.

Wokha nung NH dang masū district ajunga mokdang

Dimapur, February 10, 2024 (TYO): Wokha jila nung sensotemi mokdang ayongba civil society organisations (CSOs) pusema nungitba sayua Police Point nung adenshir lungkak aitogo.

Tanū agi anogo tasembuba National Highway 2 (tesūba NH 61) mokdang aser tanū nungi Wokha district ajunga mokdang tenzūkogo.

Wokha nung alliba sensotemi state sorkar aser bangdakpurtem dang tekaratiba nung CSOs takhangbatem agizūksū aser tangsa lenmang dak sendakba mapa inyaksū ayongzūkogo.

Honibarnū CSOs-i Wokha Deputy Commissioner aser SDO (NH) Wokha office tem shibangtsūgo. Tanūa garitem mesenzūdaksū aser

shishilababaren ajunga shibanger lungkak ait.

Bangdakpurtem dang nungi telangzūba kecha maliba agi CSOs-i mokdang atsūlangtsū lemtetogo.

Kūlen, Joint Action Committee on NH 2 two lane construction, Wokha Village-i Honibarnū Wokha DC dang nungi telangzūba ka meshiogo.

Wokha District kūbok KM 72.40 nungi KM 83 tashi R/O Compensation Money W.R.T. Two-Lane Construction of NH-2 (Old NH-61) magūtsū aliba osang metetnūa parnoki asūngdang.

JAC-i Wokha Deputy Commissioner nem anogo tenet tsūngda tanūngba sen pa indang account nung aliba osang tejangja metetdaksūgo zūngzūksūgo.

LS elections magidang CAA tenzūksū: Amit Shah

New Delhi, February 10, 2024 (Agencies): Lok Sabha elections magidang 2019 kūm latetba Citizenship (Amendment) Act (CAA) mapa tenzūksū ta Union Home Minister Amit Shah-i Honibarnū metetdaksū.

"Asen Muslim adianutem CAA atema mashileni aniogo aser ajungmesogo. CAA ya Pakistan, Afghanistan aser Bangladesh nung reshikangshi ajurur India nung arua jenokertem nem senso agūtsūtsū atema dang lir. Iba ya nisung kar dang nungi India senso agientsū atema masū" ta Amit Shah-i ashi.

Lok Sabha elections nung BJP-i menden 370 aser NDA menden 400 tema angutsū. Prime Minister Narendra Modi lenisūba kūbok onoki kūmsūk tasemben atema sorkar akūmtsū ta paisa ashi.

Lok Sabha election results atema teratatsū kecha mali aser Congress o tanga opposition party temia parnok maneni opposition benches nung amentsū angatetogo ta Shah-isa ashi.

"Onoki Constitution nungi Arla 370 agienogo. Anungji linū nung nūbortemi BJP nem menden 370 aser NDA nem

menden 400 tema moatsūtsū onoki amanger" ta paisa ashi.

Jayant Choudhary-i aniba Rashtriya Lok Dal (RLD), Shiromani Akali Dal (SAD) aser tanga regional party kari National Democratic Alliance (NDA) nung adentsū asū ta osangbeneri asūngdangdang "Bharatiya Janata Party (BJP)-i politics nung masū saka family planning nung amanger" ta Amit Shah-i langzū. Iba tetezū tanga party temi NDA nung adentsū akok ta sayur.

2024 Lok Sabha elections ya NDA aser INDIA opposition bloc tsūngda masūtsū saka terenlok aser yimyim ayimertem tsūngda asūtsū ta Shah-isa shisem.

"Uniform Civil Code ya constitutional agenda ka lir aser India nung mezūngbuba prime minister Jawaharlal Nehru aser tangartemi sign asū. Saka Congress-i nisung kar peladaksūtsū atema iba mapa senzūka yutsū. Uttarakhand nung UCC mapa tenzūkba ya lokti temelenshi ka lir. Iba ya sabang ajak nung olemteptsū aser ozūng amertemia shisadangtsū. Secular linū nung tamangba yimsū nung amendakba civil codes malitsūla" ta Amit Shah-isa metetdaksū.

Nagaland sorkari FMR agienba magizūker; Inyakyim kar latetsū

Dimapur, February 10, 2024 (Agencies): India-Myanmar arrtsū nung Free Movement Regime (FMR) agienba state sorkari magizūker ta Chief Minister Neiphiu Rio-i ashi.

Union Home Minister Amit Shah-i tawa FMR agienba metetdaksūba sūlen CM Rio-i iba ya ashi.

"The White Owl Literature Festival & Book Fair" tenzūkba sentong nung CM Rio-i osangbener den jembidang North East nung arrtsūlen inyakyim sūlen manidakba ajanga telungpur maparen kanga bulua inyakba ashi.

India sorkari security tsūtsū tebilemtsū abenba angateta lir. State cabinet-i Brihostibarnū senden ka amendang inyakyim kar latetsū mulungtepogo, ta pai ashi.

State sorkari teinyaksū mapa inyaksū saka FMR ageinba yabo public aser state sorkari magizūker ta Rio-isa shisem.

"Onoki public taginūba angashiogo aser iba jagi state sorkari FMR agientsūba magizūker. Iba atema onoki inyakdar" ta paisa ashi.

Neiphiu Rio-i aniba sorkari Centre sorkar dang temzūngtem yanglutsū aser cross-border people movement atema inyakyimtem latetsū ayongzūkogo.

Nagaland state cabinet-isa FMR inyakyim latetba nung sendaktepa aliba village council ketdangpurtem dendaktsūtsū mepishia metetdaksūgo.

Nagaland sorkarisa lisopur teloktem aser civil society organisations den Indo-Myanmar

arrtsū atsūdangtsūba aser Free Movement Regime (FRM) agienba atema senden ka amentsū lemteta lir.

Centre lemtet mapa kūma meinyakdang tamasa civil society organisations den asūngdangteptsū nūngdaker kechiyong Nagaland nungi Naga nunger aika international border adena orr Myanmar nung rongsen lir ta Chief Minister Neiphiu Rio-i tawa tu shiogo.

Centre sorkari North East nung Indo-Myanmar arrtsū 1600 km tema atsūdangtsū aser Free Movement Regime anentsū ta Union Home Minister Amit Shah-i Mongulbarnū metetdaksūgo.

North East nung state pezū Arunachal, Manipur, Meghalaya aser Nagaland-i Myanmar den arrtsūtepa lir.

Diezephe aser Tsithrongse nung Section 144 Cr. PC benoker

Dimapur, February 10, 2024 (TYO): Chumoukedima district kūbok Diezephe aser Tsithrongse yimtsūngtem nung tensa mejungi akūmba atema February 10, 2024 nikonngang 6:00 ako nungi Section 144 Cr. PC ozūng benokogo.

"Diezephe aser Tsithrongse yimtsūngtem nung aser ano Singrijan Village Juction nungi Urra Village tashi nisung pungu tema madenshitsu, sūng, kotari,

nok, nū, lijak, prangpong mesūra lendong aketba oset kecha mabentsū tetuyuba agūtsū" ta Commissioner of Police Dimapur Kevithuto Sophie IPS

Iba osang ya kija shia dangi meyokteter anungji press ajanga aser District Administration Chumoukedima aser Chumoukedima District kūbok DCP, ADCP, ACP & Police Stations ajak Notice Boards nung

metetdaksū ta Commissioner of Police Dimapur-i ashi.

Maneni, Kevithuto Sophie, IPS-isa Diezephe aser Tsithrongse nung Arms Licence holders dang anasatiba Police Station nung licensed Arms agūtsūtsū tetuyuba agūtsūgo.

Tashi mangartem anema Arms Act, 1959 kūbok ken o benoktsū aser Arms Licence agientsū akok ta paisa ashi.

CM Neiphiu Rio-i Longwa Angh'er sūngkong sayatsū



Mon, February 10, 2024 (DIPR): Chief Minister Neiphiu Rio-i Honibarnū Mon district kūbok Longwa Angh (King) Tonyei Phawang'er sūngkong atsūba sentong lapoktsū.

Centre sorkari Indo-Myanmar atsūdangtsū lemtetba ajanga telungpurtem senzūsenbong azūoktsū aswer ozūng alema drugs shibelenba anentsū aser tarutsū nung tensa tajungba akūmtsū ta CM Neiphiu Rio-i o jembidang ashi.

Centre sorkari Free Movement Regime (FMR) agienba magizūker aser iba onū

ya Cabinet nung benoka lemsateptsū ta paisa ashi.

Indo-Myanmar arrtsūlen senzūtsū atema identity card ka alitsū nūngdak ta CM Rio-i ashi.

Log Drum Pulling Ceremony nung Arunachal Pradesh aser Myanmar nungi Chief Angh tem adenba ya otsūsūtsū aketba sentong ka lir ta paisa ashi.

"Iba ama sentong ya asen putiotsū inyakyim nung ajemdaker amonger aser nisungi yangluba arrtsūtem madak lir" ta CM Rio-i metetdaksū.

Iba sentong nung Deputy Chief Minister Y Patton, NDPP

President Chingwang Konyak, Health and Family Welfare Minister Paiwang Konyak aser Forest, Environment & Climate Change and Village Guards Minister CL John nungertem aden.

Longwa nung agiba sentong nung alakteta jaokertemji Chief Angh Tangnyu; Chief Angh Konnu (Arunachal Pradesh), Chief Angh Longzang, Chief Angh Sheanghah Chingnyu, Chief Angh Kamkah (Myanmar) aser Chief Angh Pongchau (Arunachal Pradesh) nungertem liasū.

ABAM Sunday School Ministry Subject Orientation sentong agi



Impur, Tsüklai/February 10 (TYO): ABAM Sunday School Ministry Subject Orientation "Kü Sanchanutem Mesüang" Yohan 21:15 omen nung ajemdaker Feb. 9 & 10, 2024, Impur nung ABAM Zone 1-7, kanga takok ngua agiogo.

Ajak agi arogo 72 nungi Asso. Pastor Christian Education temi anir Sunday School Tesayur 476 arua iba sentong nung aden.

Tongti O jembirtem, Rev. Dr. Mar Pongener Executive Secretary, ABAM, Mr. Sukum Aier, Program Coordinator, GLF & Counsellor, IRCA & SCWS, Dr. Moanungsang Tzüdir, Secretary, Education & Literature, ABAM, aser Mrs. Alemla Mozür, Secretary, ABAM WM liasü. Parnok ajanga omen nungi aser Tanü Tanur Tia aser Lipuküm nung Tanur onüktem jembia liasü. Mrs. Abenla Aier

Coordinator, Children Ministry, ABAM aser Mr. Imsentiba Coordinator, Sunday School Ministry, ABAM, ajanga Sunday School lesson Grade 1-15 nungi sayua liasü.

Maneni asen tanurtem tim lenmang nung anitsü asoshi Tsüngrem nungi temoatsü leniba meshia sarasademer, ta Executive Secretary, ABAM Rev. Dr. Mar Pongener-i sangdong ka ajanga metetdaksü.

ULFA indang kaket tasenba nung taoba Assam DGP-i yimozülur Anil Mazumdar tepsettsü tasa asaba indang zülua lir

Guwahati, Tsüklai/February 10 (Agencies): United Liberation Front of Assam (ULFA) ya India nung telungpurtem puti otsü nung tangar ajak dang nungi balaka kechiyong parnok arrtsü adenera tesendaktep lir.

Parnok ya Pakistan, Afghanistan, Bhutan, Myanmar, Bangladesh, aser China nung ajak den sendaktepa lir aser South Asia nung Liberation Tigers of Tamil Eelam sülen tanabuba jenjang nung lir.

Rajeev Bhattacharyya-i züluba "ULFA: The Mirage of Dawn" ya iba telok indang virtual autobiography ka lir.

Iba kaket nung tongtibang tatalokbatem aser parnok kechi atema nokdaker item ajak indang shisema lir.

Kaket nung kaket züluri taoba director general of Assam Police-i yimozülur Anil

Mazumdar Guwahati nung tepsettsü atema nisung ka nem taa agütsüba indang shisema lir.

Taoba director general of Assam police yagi bendanga agütsür aliba ULFA (SULFA) activist ka yimozülur Anil Mazumdar Guwahati nung tepsettsü atema atema 2009 küm March 24 nü hire süa liasü.

Hopta ana lir police tekolakba yagi ano Nagaon nungi tanga SULFA activist ka, kuli ajak agintsü atema pai mezüing hire asüba nisungba tepsettsü atema hire süa liasü.

Police tekolakba yagi iba inyakyim atema Mumbai dockyard nung SULFA activist tem telok ka tenteta liasü aser iba den sorkar contract balala agizüka inyakba den Assam nung ali aika rakzüka liasü.

CID-i Anil Mazumdar tepsetba ken o tejakdangi bener motet aser ibayongji asüsang

kinungtsüi temepeshiba ka benokba sülen Gauhati High Court-i iba ken o ya CBI nem agüja liasü.

Iba sülen CBI-i, Mazumdar tepsetsang ya SULFA activist Bijoy Phukan ta jangja aküm.

Anil Mazumdar ya Assamese oshi nung adokba Aji osang kaket yimozülur liasü. Pa 2009 küm Rajgarh nung office nungi par kidangi oya aliba mapang mejangjaba nisung kati khaset. Pa indang gari anisang Ramen Nath aser par kiyongertemi pa mozüki dangi anir ao, kong Mazumdar süatok.

Iba kaket ya tanü New Delhi nung Press Club of India nung sayaogo.

Sentong nung panelist tem ya taoba Myanmar ambassador Rajiv Bhatia aser Maj Gen (Retd) Dipankar Banerjee na liasü shiba UN indang consultant ka liasü.

AR-i ayongba National Integration Tour Uttarakhand tongogo

Dimapur, Tsüklai/February 10 (TYO): Kohima nungi tenzüka National Integration Tour ya February 9 nü Ranikhet, Uttarakhand nung Kumaon aser Naga Regimental Centre

tongogo.

February 9 nü Nagaland nungi aoba team-i Kumaon nung view point, Naga Regimental Centre (KRC), Jhulla devi temple aser yimi kübok tesem

balala semdanga liasü.

Sentong nung shilem agirtemi Regimental Centre nung cadet tem training agiba nguogo aser iba ajanga parnok nem tangazükba balala agütsüogo.



Dimapur Govt college nung kaketshirtemi ayongzükba sobaliba sentong nung Ao Kaketshirtemi Jina aser Etiben na jilushi aiba noksa nung angur. (Dimapur, Feb.09, 2024).

Akhil Gogoi-i CAA anema nokdak; state ajunga nung longkak aitsü ayongzük

Guwahati, Tsüklai/February 10 (Agencies): Sivasgar MLA aser Raijor Dal tekolakba Akhil Gogoi-i, Union Home Minsiter Amit Shah-i Citizenship Amendment Act (CAA) ya Lok Sabha election magi tsüingda benoktsü ta ashiba anema nokdakba lemsatepogo.

Gogoi-isa, iba ozüing ya benokra state ajunga nung longkak kanga sashia aitsü, ta ashi.

Raijor Dal lenir yagi ashiba agi, CAA ya communal law ka aser iba ya benokba ajanga ozüing alema arur aliba Bangladesh nung Hindu yimsü dak amangertem shirnok Assam nung lidar parnok nem lisopur jenjang agütsütsü.

"Onoki Home Minister Amit Shah-i CAA ya Lok Sabha election magi tsüingda benoktsü ta ashiba anemer. CAA ya temzüing ozüing aser democracy

anema lir. CAA ya communal aser tamangba yimsü agi ajungmesoba temzüing ozüing ka lir. Onoki iba ozüing ya kodanga magizüktsü. CAA ya benokra Bangladesh nung Hindu yimsü dak amanger lakh 15 nungi 20 tsüingda, shirnok Assam nung ozüing alema arua lidar parnok nem India lisopur jenjang agütsütsü. Kasa mapang nung Bangladesh nung Hindu nung 1 crore 70 lakh lia alirtem shirnok bendangertem lir parnok India aser talisa Assam aser Northeast-i aitsü atema lenmang sadema lapoktsütsü. Anungji CAA ya onok atema khuret tulu lir," ta Gogoi-i ashi.

Amit Shah-i tanü Citizenship (Amendment) Act (CAA) koba 2019 küm agizükogo, iba ya taküm Lok Sabha elections magi tsüingda benoktsü ta ashiba sülen Sivasgar MLA yagi iba olen ya lemsatepa liasü.



MMC shopping complex nung mi lendong ajanga takoksa ajururtem den aria bilem sayua Longsa nung Arkong Ward, Mokokchung nung alir arishi küm 86 tain, Takowati-i tenla 10,000/- (rupees ten thousand) Mokokchung D.C, Thsuvisie Phoiji nem amoktsüba mapang tangokba noksa nung angur. Tsürabur Takowati ya Rtd. Police Inspector ka lir aser pa ya Nagaland nungi mezüing Dog Master lir. Mokokchung, February 10, 2024

Mizoram MP-i India-Myanmar arrtsü atsütsü asadangshitsü mepeshi

Aizawal, Tsüklai/February 10 (TYO): Mizoram nungi Rajya Sabha MP K Vanlalvena-i Centre sorkar dang India aser Myanmar na arrtsü atsütsü asoshi telemteba agir aliba ya asadangshitsü mepeshia asüingdangogo.

Mizoram MP K Vanlalvena-i, ken o dak sendakba nung union home minister Amit Shah dangi shiti ka zülüogo.

Union home minister Amit Shah dangi züluba shiti nung Mizoram MP K Vanlalvena-i, Centre-i India aser Myanmar na arrtsü atsütsü asoshi telemteba agiba süokia bilemba lemsatepogo.

Pai ashiba agi, India Myanmar arrtsü atsübangba ajanga Mizoram nung aliba nüburtem atema tetsükdaktsü aika adokdaktsütsü.

Maneni Mizoram MP yagisa, Myanmar den free movement regime (FMR) agintsü asoshi Centre-i sangdongba aija liasü.

Pai, Myanmar den free movement regime (FMR) aginba tetezü ango apudak aser alu ayimdak ali kilometer 500 akoksatsü, ta ashi.

Mizoram MP K Vanlalvena-isa shiti nung ashiba agi, India

as er Myanmar na arrtsü nung atsü atsüba ajanga arrtsü nung aliba Mizo nungertem anogoshia inyakyim nung tetsükdaktsü adoktsü.

Temetettsü kaji Mizoram chief minister Lalduhoma-ia, India aser Myanmar na arrtsü nung atsü atsütsü aser Myanmar den free movement regime (FMR) benoka aliba agintsü atema Centre-i telemteba agiba anemba lemsatepogo.

Brehostibarnü (February 8) nü union home minister Amit Shah-i, ministry of home affairs (MHA)-i, linük tekümzükba kübok toktsütsü atema India aser Myanmar na tsüingda free movement regime (FMR) benoka aliba agintsü telemteba agiogo, ta sangdonga liasü.

Union home minister-i ashiba agi, Myanmar den arrtsü nung aliba Northeast state tem indang demographic structure meraksadaktsütsü atema iba telemteba agiogo.

Kasa mapang nung Amit Shah-i tawa ashiba agi, union sorkari Northeast nung India aser Myanmar na tsüingda arrtsü kilometer 1643 aliba ajunga atsübangtsü asoshi telemteba agiogo.



February 10, 2024 nü New Delhi nung Foundation Day lecture nung Chief Justice of India (CJI) Justice DY Chandrachud, International Court of Justice judge, Hilary Charlesworth (abelen) aser Supreme Court Judge Justice Surya Kant nung tangokba noksa nung angur.

LS election matongdang CAA mapa kuma benoktsü: Amit Shah

New Delhi, Tsüklai/February 10 (Agencies): Honibarnü Union Home Minister, Amit Shah-i, 2019 kum agizükba Citizenship (Amendment) Act (CAA) ozüing taküm Lok Sabha election matongdangsa mapa kuma benoktsü, ta metetdaksü.



Amit Shah

ET NOW Global Business Summit 2024 nung jembidang Shah-i, "Asen Muslim adianutem dang osang tai ashir aser iba (CAA) anema ajungmesor. CAA ya Pakistan, Afghanistan aser Bangladesh nung yimsü tsütsülen nungi reshikangshi ajanga India-i arurtem nem senso agütsütsü atema dang lir. Iba ya nisung kar dang nungi India senso agientsü atema masü," ta metetdaksü.

yimyim kija ayimertem na tsüingda tetoktepba asütsü, ta ashi.

Congress lenir Rahul Gandhi leniba nung 'Bharat Jodo Yatra' agiba dak sendakba nung nü tebilemba kechi, ta asüingdangba langzüdang Shah-i, iba ama sentong agitsü atema Nehru-Gandhi kibong nungi jakzüksang (Rahul) dak temeden mali, kechiyong 1947 kum linük ana kuma lemdangbaji par party ajanga lir, ta ashi.

Union Minister-isa, taruba Lok Sabha election nung BJP-i menden 370 angutsü aser NDA teloktepi menden 400 dak tema ngua Ato kilonser, Narendra Modi leniba nung kümsük (term) tasembuba sorkar akümtsü, ta ashi.

Ayodhya nung Ram tekülem ki semzükba dak sendakba nung home minister-i, "Tesüiba kum 500-550 tashi linük nung nüburtemi Ram asoba tesem nung tekülem ki ka asütsüla ta bilema liasü, ajisüaka mangatetep madokdaksütsü aser tensa meraksadaksütsü atema iba tesem nungji Ram tekülem ki asütsü temelaba magütsü liasü," ta ashi.

Shah-isa, Congress aser tanga opposition party temia maneni parnok opposition menden nungsa amentsü ta metetogo, ta ashi.

Uniform Civil Code (UCC) dak sendakba nung Shah-i, iba ya linük temzüng nung aliba onük ka lir, aser iba nungji linük nung mezüngbuba Ato kilonser, Jawaharlal Nehru den tangartemia sign süa liasü, ta metetdaksü.

"Onoki Arlla 370 agienogo. Anungji iba linük nung nüburtemi temoatsü agüja BJP nem menden 370 aser NDA nem menden 400 dak tema agütsütsü ta onoki amanger," ta pai ashi.

"Uttarakhand nung UCC agizükba ya loktiliba nung temelenshi ka lir. Iba ya sabang ajak nung benoka o lemteptsü aser legal tsütsülen nungia repringshitsü. Secular linük ka nung yimsü nung ajemdaker ozüingtem alitsü makok," ta paisa shisem.

Jayant Choudhary-i aniba Rashtriya Lok Dal (RLD), Shiromani Akali Dal (SAD) aser tanga regional party kari National Democratic Alliance (NDA) nung adentsü asü?, ta asüingdangba langzüdang Shah-i, "Bharatiya Janata Party (BJP)-i kibong sentong yanglur, saka politics masayar," ta ashi.

Shah-i, 2024 kum general election ya NDA aser INDIA opposition teloktep na tsüingda tetoktepba ka masütsü saka terenlok mapa inyakertem aser

17buba Lok Sabha nung tongti telemtetba aika agiogo: PM Modi

New Delhi, Tsüklai/February 10 (Agencies): Honibarnü Parliament nung budget senden tatembangbuba anogo nung Ato kilonser Narendra Modi-i, 17buba Lok Sabha senden nung kanga tongtibang telemtetba aika agiogo, ta metetdaksü.

Reservation bill agizük, ta metetdaksü.

17buba Lok Sabha senden shilem 97 agiteta liasü aser iba mapang nungji bill ajak senteper 30 agizükogo, ta pai ashi.

"Tesüiba kum pongui linük yanglushiba, linüki inyaktetba aser melenshiba nung yariogo. Tashitait India ka akümtsü atema tamendakdak yanglutsü asoshi tesüiba kum pongu nung telemtetba aika agiogo," ta Modi-i metetdaksü.

"Khen nung asemprongla (linük yanglushiba, linüki inyaktetba aser melenshiba) atalokbaji khenyong balaka liasü. Linüki 17buba Lok Sabha maneni moatsütsü ta ni amanger," ta pai ashi.

Arlla 370 agienba dak sendakba nung Ato kilonser, "Putu aika nüburtemi temzüng ka aginüa liasü saka iba House-i Arlla 370 agien. Linük

temzüng yangluba nung shilem agirtemi tanü asenok moaja alitsüa akok. Kashmir nung nüburtemi loktiliba nung temeden mengui liasü. Tanübo asenoki parnok nem item temeden agütsüogo," ta ashi.

Kiralongra anema ozüing tesashi yangluba dak sendakba nung Modi-i, "Onoki kiralongra anema ozüing tesashiba yangluogo. Iba ya ajanga kiralongra ajanga takoksa angurtemi tesünep angutsü aser India ya kiralongra maliba linük akümtsü," ta metetdaksü.

Modi-isa, enoc nisungtem densema loktiliba nung sendokbapurtem atema rangloker inyakba metetdaksü.

"Sorkari enoc 17,000 nem identity cards agütsüogo. Onoki enoc nisungtem nem-a Padma awards agütsüogo," ta paisa shisem.

Tang India nung voters crore 97 jungnüa lir: Election Commission

New Delhi, February 10 (Agencies): Election Commission (EC)-i, taruba Lok Sabha election nung vote agütsütsü temsüa alir India nung crore 97 lir, ta metetdaksü.

election nung vote agütsütsü temsüa alirtem züingdangba den medemdangra tang voters shilem 6 bendenlokogo.

"Alima nung voters teimtiba aliba linük nung taruba General Election nung vote agütsütsü atema tenüing register süa alir crore 96.88 lir," ta EC-i metetdaksü.

Tetsür-tebur ratio-a tajungba kumogo, kechiyong 2023 kum tebur 1,000 shia

nungi tetsür 940 aliba 2024 nungi tebur 1000 shia nungi tetsür 948 kumogo, ta EC-i metetdaksü.

Hokolbarnü Pune nung osangbenertem senden ka nung Chief Election Commissioner, Rajiv Kumar-i electoral rolls repringshiba maparen aser iba maparen ajak nung yimtenren party tem nem-a shilem agidaksüba metetdakja liasü.



February 10, 2024 nü Perth (Australia) nung 7buba Indian Ocean Conference nung India Union External Affairs Minister, S Jaishankar (ajichilen), Australia Minister for Foreign Affairs, Penny Wong aser tangartem adenba noksa nung angur.

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

[Rule - 8(1)]
KIOJEN AGIBA NOTICE

Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsüinglanglen sign süa aliba State Bank of India officer-i 04.11.2023 anogo nung Demand Notice ka ajanga sen apurtem **M/s Piwoka Furniture Unit, Proprietor Mr. Piwoka Chiso, S/o. Mr. Kikheto Chiso**, dang notice agütsüba sülen anogo 60 tsüingda notice nung shia alima ama sentsüh Rs.57,23,794.35 (Rupees Fifty Seven Lakhs Twenty Three Thousand Seven Hundred and Ninety Four and Thirty Five Paise only) agüjang, ta tuyua liasü.

Ajisüaka sen apuri senji magütsütet nung sen apur/Guarantor aser nüburtem dang tsüinglanglen sign süa aliri iba Act kübok Section 13(4) aser Security Interest (Enforcement) Rules, 2002 kübok Rule 8 nung agüja aliba tashi amshia 2024 kum February 9 nü tsüinglanglen shia aliba kiojen agiadokogo, ta sangdonger.

Sen apur/Guarantor aser nüburtem dang iba kiojen dak sendakba nung kechia inyaksangshi masütsü metetdaksür aser kari danga tetuyuba anema inyakra State Bank of India-i Rs.57,23,794.35 (Rupees Fifty Seven Lakhs Twenty Three Thousand Seven Hundred and Ninety Four and Thirty Five Paise only) den 05.11.2023 anogo nungi tenzuka tetemlok aser tanga teindokba sen meshitsü.

Sen apur dang iba Act nung Section 13 kübok Sub-Section (8) nung aliba ama mapang shidak nung item kiojen alanzüktsü atema inyaktsü metetdaksür.

Kiojen osang tejangja:
Belenshitetba kiojen terasa
Furniture stocks agiba
Mebelenshitetba kiojen tesara
Piwoka Chiso, S/o, Kikheto Chiso meyong kiojen.
Lhomithi Village, Dimapur, Nagaland nung Block 8, Mouza 3 nung Patla No. 1053, Dag No. 702/1158 agi ayimjemba kimong aser building aser area tasazuk 00B-01K-14L.
North tsütsülen: Approach road, **South tsütsülen:** Nallah, **East tsütsülen:** Kikheto'er kimong aser **West tsütsülen:** Itoka Chish'er kimong.

Anogo: 09.02.2024 (S/d) AUTHORISED Officer
Tesem: Jorhat (State Bank of India, SARB Jorhat Branch)



TIR YIMYIM

YIMOBILEM (EDITORIAL)

DIMAPUR AMUNGNÜ, FEBRUARY (TSÜKLAI) 11, 2024

Tsüngrem meimba mulungjang

Asenoki Tsüngrem asoshi tenla tulu agütsütsü akok mesüra Pa tenüng nung mapa tulu inyaksü akok, saka asenoki angatetsüba kaji item tenla aser mapa tajungtem jagi asenoki Tsüngrem mepeladaksütetsü. Tsüngrem peladaksütsüba mapajibo ka dang lir aser ibaji asen mulungjangji Tsüngrem meimba mulungjang asütsüla. Nisung mulungjangsa tekülakba asünungji, nisungi Tsüngrembo memeimer saka Pa meimer amato sayutsü asoshi nisungtem tsüngdang mapa tajung aika inyaka sayur aser tenlaa tulu agütsür. Ajisüaka, Hosea tapu 6:6 nung Tsüngremi ashir, " ..ni tetepsetba tenla masü temeim takang aginür aser tarongba tenla masü, Tsüngrem metetba shisatsü aginür." Ajisüaka, nisungtemi aiben parnok mulungjangbo Pa nungi talangka pilaa lir ser nung, tenla agi mesüra arogo aser mission mapa nung tenzüka agi Pa peladaksütsü merangba asenoki meteta lir. 1 Samuel 15 nung asenoki züngdangra Saul chubai Tsüngremi ashibabo manga saka Pa nem tenla agütsütsü asoshi parnok tsükchir meyong san aser nashi chanutem bener aru ta Samuel ainker dang ashiba asenoki angur. Shitakba nungbo itemji apayuba agi mesamatsüi parnok agitsü bener aruba liasü saka Tsüngrem nem tenla agütsütsü bener aru ta ashiba asenoki angur. Tsüngremi ajak samajang ta ashi saka mesamatsü aser tangbo Pa nem tenla agütsütsü indang jembia sayur. Iba mapang nung Saul chuba mulungjang ateta anguba Tsüngrem komaka jashir alitsü ta bilemer. Tanü asen putu nunga asenoki ochimashiba mapa ajakji samatsütsüba ser nung apayuba agi aser aginüba agi mesamatsüi asenok atema bendener aser iba nung jagi ter shilem, temoatsü aser tenüngsang tenla agütsür. Ashiko, asenoki mangashir dang ashi, Tsüngremi ashi angabajiang asenoki tenla agütsüba dang nungi tajungba ta asen mulungjang nung shipet shidar asütsü. Aji oda, asenoki jungjunga bilemdangra, asenoki tenla tulu agütsür ta bilema agütsü saka iba tenlaji Tsüngrem tsüngdang tagizüktetsü tenla ka mesüra koda amajok asütsü ! David chuba kümer külena pai Tsüngrem tsüba inyaknungji, pai aibelenba mapatembo Tsüngremi mangu aser memetet ta bilema liasü südi, saka 2 Samuel tapu 12 nung Nathan ainker ajanga Tsüngremi David tai jakdaka puteta ashiba asenoki angutsü. Shingaia memetet asenoki Tsüngremi maginütsüsa inyaker. Asenok mulungjangbo memerük memeshi agi sünga lir saka tema nung asenoki Tsüngrem nung sanga sayur aser Pa mapa nung jangrabangraa inyaker. Ajisüaka, David-i miima inyakba angusang aser putetsang Tsüngremji asen Tsüngrem lir. Asen Tsüngremi asenoki kechi jembir mesüra kechi inyaker mesüra kechi agütsür ta masü saka asenok mulungjang nung kechi bilemer ta asübaji dang agir. Atangji, taidok nangzük nungji Tsüngremi David dang tai adok saka pai menaba tai yari pa akoksa aser kangshi. Tenyartem mapanga Ananias aser Sapphira nati tangari tenla agütsüba jilu ajizüka tenata tena meyong ali yoker tenla tulu bener arutsüba jagi tena mulung nung ochimashi bilema inyakba tajibo Tsüngremi adoktsü ta bilema liasü südi. Ajisüaka, Tenyar mapa 5 nung tena dak kechi atalok asenoki tanü azünger. Tsüngremi asenok kechi inyaker mesüra kwi agütsür ta asübaji masü saka koma inyaker aser koma agütsür ta asübaji dang agir. Asenoki ibaji angateta Tsüngrem nem ochi aser Pa meimba mulungjang agütsüra, tenla tulu agütsüba dang nungibo tashi angaba tenlajiang tuluba ta asüba Tsüngremer taginübaji ataloktsür asütsü. Tenyar Paul-ia Tsüngrem mapa nung temulungtetba tulu agi jangrabangraa inyakbaji teperi ta kenbo bilem südi. Ajisüaka, kodang tanüla temeshi ajanga pa nem Tsüngremi mulungba angatetba shisatsü agütsü, pai 1 Korint tapu 13 nung ashi, " ni' kotak tenyar o agi jembia, ni' shinaka, miim o ajak angatetsüsa shisatsü liaka aser tenem dena ajungdoktsüsa kü dak tamang tulu liaka, ni sensaker asoshi kü rongsen ajak bendanga agüjaaka aser kü mang tarongba tenla kümer tenla agüjaka, kü mulungjang nung temeim melira, ni kecha masü." Tsüngremi asenok dang nungi aginübaji rongsen masü aser taküm bendanga agütsüba tenlaa masü saka shitakba Pa meimba temulungjang tenla aginür.

OLEMSABANG

ANEMA ALITSÜ ATEMA ANEPALUTSÜYIM KAR

Dr. Tali Longkumer
Consultant Gastro Dimapur

Asenok temang anema aliba tetezü, (Healthy living), shi temang aser shisatsü (body and mind) anapongla külemi liromedema (balance) lia otetba dang ajar. Asenok shi (body) nung anema liaka, shisatsü mesüra temulung nung anisüngzük melira amajok asütsü. Sura asenoki koma ka anepalua anaji liromedema yutetsü? Asenok anema alitsü mechinung shi temang, chiyungtsü, libaliro (Lifestyle) aser temulungjang mesüra tekolok anisungzük kanga tongtibang lir. Asenoki chiyongtsü mashie chia, libaliro mazüoki lira item ajanga tashitak aika adoker.

Asenok anema alitsü atema tongtibang teinyaksütemji:-

1. Chiyongtsü (food) tapet achitsüla.
2. Libaliro tetemsü aser azüoka ayutsüla.
3. Exercise regular agitsüla.
4. Regular health check up, anema alidanga asütsüla.
5. Tashidak aketertem teti checkup alitsüla, talisa
 - (a) Blood pressure
 - (b) Diabetes
 - (c) Temulungjang tashidak
 - (d) Stroke aser
 - (e) Cancer agi shirnok tonga lir, parnok asoshi tongtibang.

1) Chiyongtsü Tapettem aser chiyongba yimya:-

Asenok anema alitsü aser temang aientsü atema chiyongtsü palala nungdaker. Tanur kinu nungi teintet tamburtem tashi pei dak apetba chiyongtsü achitsüla. Anogo nung chiyongtsü asemben (3 times) pusa achitsüla ta ashir, breakfast, lunch aser dinner. Aonung chiyongji ulura (dinner) mechiyongtsüla ta ashir. Kokra sungolio aser süngjang lijang peria achitsüla. Ak shi (pork) aser nashi shi (beef) tetibo machitsüla. Chiyongdanga tasazük (limit) ka dang chiang. Temo (fats), tanang aser chini (sugar) aser metsü (salt) kanga tali mamshitsüla. Aonung chiyongji (dinner) menua mechiyongtsüla. Tanurtem nem- ice cream, chocolates, sweets, cold drinks aser junk food tali magütsütsüla. Tali chiyongra, temang overweight kuma, tashitak balala eg. ,Diabetes, High Blood Pressure, Heart attack, Stroke agi atongtsü ana nung lir. Talisa nisung kar diabetes aser blood pressure tashitak, temulungjang timtem agi tonger lira doctortem aser dietician temi tetuyuba amaji achitsü merangtsüla.

2) Anema alitsü libaliro (Healthy lifestyle):-

Asenoki jembia aruba amaji chiyongtsü mazüokba ajanga tashitak palala adoker. Iba rongnung, overweight koba dang obesity ta ajar aser blood pressure tashitak aser diabetes temya alitsü. Ano kulen, exercise teti agiba ajanga tashitak aika nungi jenpua litetsü lenmang lir. Nai anogo ka nung minute 30-40 tashi exercise agitetra, heart attack, stroke, diabetes aser blood pressure tashitaktem nungi kümzüka litetsü. Iba dak ya alaka ano asenok achi ajemba nung mazüoki- mokhu (smoking) achiba, yi ajemba aser sada (tobacco) aser pan achiba ajanga tashitak aika adoka taküm laluba asenoki meteta lir. Mokhu achiba ajanga heart attack, stroke, lung cancer aser bronchitis adokba agi nisungtem shirangba kuli tejangja lir. Noklang nung 25% heart attack ya mokhu achiba ajanga ataloker ta ashir. Lung cancer ji 90% bo mokhu achiba ajanga adoker. Yi (alcohol) ajemertem, Temesen (liver) tashitak, temulungjang tashitak, tezü (nerve) tashitak, temesen cancer, aser throat cancer agi atonger. Sada (tobacco) amshirtema, mouth cancer, throat cancer, gastric cancer aser ulcer agi atongba kuli lir.

Anungji asenok anema alitsü atema taküm libaliro (lifestyle) ya kanga kümdanga alitsüla.

3) Exercise :-

Asenoki jembia aruba amaji, shirnoki exercise junga magir, (sedentary life) parnok dak stroke, heart attack, diabetes tali pulua adoker. Kokrabangla walking, jogging, cycling, item exercise ya hopta nung anogo pezü-pungo (4-5 days per week) pusa agitsüla ta ashir.

4) Regular Body check up :-

Aiben asen Naga nungertemi temang regular check up masür. Kokrabangla, küm 50 shi temabo küm nung khenbusa temang tendanga, azü (blood) test aser X-ray aser Ultrasound tem ya inyaktetra kanga tajangzük alitsü. Kechiba süra iba ajanga tashitak yakta puteta taneptsü ngutetsü lenmang bushitetsü. Aiben tashitak kanga menurang putetpaya asenok regular/annual check up masüba ajanga lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Turkey nung Khristantemi Antioch-i meyipa aotsü atema sarasadem



February 06, 2024 nü Turkey kübok Antioch nung Khristantemi sarasadem sentong ayongzüka agidang tangokba noksa nung angur.

February 10, 2024: Antioch Greek Orthodox Arogo ajanga Turkey kübok Antakya nung Khristantem kum noklang aika longjema liasü, ajisiüka yaküm menoknok lendong nung Khristan aika asü aser noklang aika jena liasü.

Tang Antioch nung menoknok ajanga teraksatsüba liaka Khristantemi tanaben iba yimti jagi meyipa aotsü atema sarasadem.

Yaküm menoknok lendong nung asürtem nungtem nung Mongolbarnü (February 06) ayongzüka sentong ka nung jembidang Antakya nung Greek Orthodox Church Foundation nung tongti, Fadi Hurigil-i, "Ozi Arogo Tenla kitem raksaogo aser tsüngsüng tongshitem nungi ola madoki lir," ta ashi.

Yaküm February 6 nü Turkey aser Syria nung 7.8 magnitude nung menoknok lendong ataloka liasü. Iba lendong nung Turkey nung nisung 53,000 dak tema asü aser Syria nung nisung 6,000 jungnüa asü. Iba lendong ajanga nisung million aika talidak makai aküm.

Tang Antakya ya akhidang 'Antioch' ta jaa liasü. Antioch ya 300 BC nung Seleucid yimli ajanga tenteta liasü.

Akhidang aliba Antioch yimti nung Yihuda nung, Khristantem aser Muslim nungertem liasü, aser iba yimti ya kum noklang aika Greek, Rome, Arabs aser Ottoman

Turk nunger kübok melentepa liasü.

Yaküm menoknok lendong nung Antioch nung Khristan Khristan 63 asü. Mongolbarnü Khristantem Tenla kidang adenshia Arabic aser Turkish oshi nung sarasadema liasü.

Tenla ki teraksa nungjagi Kangkitem aser tekülem agidang amshiba oshi aika nguteta Hatay Archeology Museum nem agütsüogo, ta Hurigil-i metetdaksü.

Iba sentong nungji adener medical student, Larina Balikcioglu-i, "Menoknok anakba sülen tang mezüng ni iba Tenla ki teraksa angu. Teraksatsübatem kü nuk agi angudang ni mamangteti liasü," ta ashi.

1872 kum nunga menoknok lendong ka nung Antioch Greek Orthodox Arogo Tenla ki raksaa liasü saka Russia nungertemi yanglu. Ano maneni iba Tenla ki yanglushitsü atema project agizükogo. Ali survey agiba sülen Tenla ki süshi tenzüksü.

Hurigil-i, "Iba yimti ya tenetben raksa aser tenetben yanglushiogo. Tang agi tibenbuba iba yimti raksaogo, saka tanaben yanglushitsü," ta metetdaksü.

2023 kum iba yimti nung Greek Orthodox kibong 370 shi liasü saka menoknok lendong atalokdang parnok aika jenshiba sülen tangbo Orthodox kibong 20 dang anünga lir, ta pai ashi.

Arrshi kum 49 Hurigil ya Antakya nung soa inet.

Orthodox kibong 45 bo Mersin province-i oa idakji lidar, ta pai ashi.

"Antakya toktsür aoertem atema iba yimti ya tongtibang, kechiyong iba yimti nung parnok tera yanga lir aser parnok meyong li lir. Iba yimti toktsütsüji onok atema temela masü," ta pai ashi.

Greek Orthodox Khristan, David Cagan-i, "Iba yimti nung Tenla kitem tanaben yanglushitsüji kanga nungdak. Menoknok lendong matalokdanga kum shia Antakya nung Khristantem tajemba dang küma liasü, aser tang tesüsa menoknok lendong ajanga iba yimti nung Khristantem samatsüsa tensa ka nung lir," ta metetdaksü.

"Tenla kitem ajanga onok longjemdaksür, saka Tenla ki melira onok melongjemtetsü, anungji Tenla kitem yanglushitsüji tongtibang aser nungdak," ta paisa ashi.

Turkey ketdangsertem aser international organisations-i iba yimti nung project balala ajungkettsüsüla, ibaji ajanga nüburtem tanaben Antakya-i meyipa aotsü atema ajungmesotsü, ta paisa metetdaksü.

"Onoki iba yimti metoktsütsü. Iba yimti tanelaji nüburtem lir. Yimti toktsür aoertem dang tanaben meyipa arutsü ni mepishir," ta paisa shisem.

ANO GO ABEN TSÜNGREM DEN

PENIEL TENUNG TASEN
ANGUDAK TESEM

Yakobi ashi, Ni Tsüngrem tejak o tejak na jetepa nguogo, aji saka ni ano taküm alir. Anungji pai iba linük dang Peniel aja.

~ Lipok 32:30

Yakobi pa toku den monga aliba tesem Haran lima toktsür pa kibutsütem, kilir, kilitsür aser pa akaba ajak den tebu nung lima, pei nübor dangi apusoa ao. Jajayonga arur parnoki kodang Peniel linük atong, yang nung jagi Yakobi pa den aliba ajak pa nungi piladakja pa kisüng liasu. Iba tesem nung kodang kija liasü, Tsüngrem tenyar pa dangi jungkai adok aser pa den tejak o tejak na chitepa melangtep, jembi aser tatem nung moaja ashi, "Joko ne tenung Yakob ta majatsü, saka 'Israel,' kechiaser nai Tsüngrem aser nisung den toktep aser nai akok".

Yakob ya tobula nung Abraham nungi senmang amanga aruba Tsüngrem kin, saka süngyanglu balala aika bener jajaba taküm. Saka kodang pai item ajakji pa nungi pilaa yok. Pai pei tanela jenjang bushitet, Tsüngrem taochi senmanger aküm. Tsüngrem taochi bushitetba tesem Peniel, kong pai tenung tasen ka angu.

Adianutem asen tetsü tobu nungi tamangertem asenok, saka Tsüngrem asen dangi jungkai adoka mejembitsüsa asen dak süngyanglu balala mesükba taküm yimya aika sobua alitsü shibai metet, arung Yakok ama asen aliba alima tashi tarakmokba koba agisa alena ali, item ajak salaa indoker Tsüngrem taochi bushia pai asen nem tenung tasen ka memelentsü tashi maneni tanela tongpang tajung rarar ka ka akümstsü merangdi. Amen.

Gaza nung Khristan 1000 dang lir aser rara ajanga Khristan 30 süogo

February 10, 2024: Gaza Strip nung rara ajanga Khristan 30 süogo, aser tang Gaza nung Khristan nütsüng 1,000 shi dang lir, ta Arogo lenirtemi metetdaksü.

Gaza Strip nung nütsüng 1,000 shi dang anünga lir; Gaza nung rara tenzüka sülen tesüba ita pezü tsüngda Khristan 30 shi süogo; sepaitemi Khristan 19 tepset aser Khristan 11 bo medical teyari maliba ajanga asü.

Yaküm December ita nung Khristan tetsür anabo Holy Family Catholic Church nung lia khaset.

Gaza nung aliba Arogo ka

nung putir ka den sisters teneti Khristan 560 shi anepalua repringdar; parnok rongnung tanur 140 densema lir.

Yaküm October ita nung anüngen nungi rockets amshia St Porphyrios Greek Orthodox Arogo Tenla ki compound amakba mapang nung yangji jenoka alir Khristan 17 asü aser tetsür ana snipers-i khaset.

Ano Khristan 11 bo medical teyari shidak manguba agi asü. Parnok rongnung arrshi kum 48, Hani Abu Daud densema lir. Gaza nung totzü aser electricity maliba ajanga pa dialysis treatment magiteti asü.

Latin Patriarchate of Jerusalem kübok Project Development Office nung director, George Akroush-i Khristan melungtet telok Aid to the Church in Need (ACN) dang, "Diesel litre 20 nung pound sen 170 adoker saka iba totzü jagi generator ghonda ana dang amshitet," ta ashi.

World Health Organization (WHO)-ia, Gaza nung anogoshia tensa tamajungba dang akümer, chiyungtsü aser totzü agi anünger, iba denji külemi hospital tem nung service junga magütsüteter, ta metetdaksüogo.

George Akroush-i, Tenla kitem nung jenoka alirtem ayazüka aotsü tasak, kechiyong sepaitemi melung melemteti khasetsüa akok, ta ashi.

"Ita pezü tashi Tenla kitem nung jenoka alirtem kanga lulaogo aser parnok aika shiranger. Gaza nung teraksatsüba ajanga Khristan yimsü samatsüsa lir," ta pai ashi.

ACN den jembidang Akroush-i, "Kiojen shilem 62 bo raksaogo aser 2093 kum tashi nung ang kiojen ajak yanglushitettsü, ta international teloktem aser United Nations agencies-i asadangtetogo. Iba

ama tensa ka nungji iba linük (Gaza) nung Khristantem tarutsü jenjang koma asütsü, ta arendaker," ta metetdaksü.

"Yimlibilema onok atema sarasademjang. Iba lima nung timtemba Khristantem mamatoktsüla," ta paisa metetdaksü.

Khristan melungtet telok ACN-i Latin Patriarchate of Jerusalem den yaritepa Gaza, West Bank aser East Jerusalem nung Khristantem nem chiyungtsü coupons, medical teyari, kisütsü atema senotsü teyari aser tuition fees agüja arudar.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Shitok

(v) süoshi ashi, tzü agi merüktet (washed clothes, cleanse with water)

* Onoki süoshi aser chiyongtsü ajak tzü tajung agi shitok.

Shitok

(v) tzü meküptok, tzü entok (throw off water)

* Pai tzü tamajung ajak kimalen shitok.

OLONG PAITEP # 6694

1						2				3
								4		
5		6				7				
8										9
									10	
					11		12			
		13								
14							15			
					16					

TIPLIN

- 1. Ojembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzük asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6693 TELANGZÜBA

TIPLIN :

- 1. Maka 5. Ocet 6. Tekülak 10. Ano. Bilemdang 12. Tar 15. Chisang 17. Aket 18. Tasü

LANGTSÜNGLEN :

- 1 Metsü 2. Asü 3. Yiar 4. Tekong 7. Kilir 8. Ber 9. Odi 10. Anasa 11. Bangka 13. Angsü 14. Shin 16. Sot

NAI-A YA METETTER MA



Yashoda Lodhi-i November 2021 nungi la indang mezüngbuba smartphone amshia YouTube channel ka lapok aser English language acquisition sayutsü tenzük. La dang "Dehati Madam" ta ajar aser Uttar Pradesh kübok Kaushambi nungi lai YouTube channel ajanga English sayur. English educator Yashoda Lodhi-i YouTube channel ajanga English tutorials sayur. La kinungboi aayangba mapang anogo nung Rs 300 shi aazükba agi kibong mesüa aru saka tangbo lai ita nung Rs 70,000 aser Rs 80,000 tsüngda aazüker.

Nyishi Indigenous Art & Archive-cum-Cultural Centre lapok



Itanagar, February 10, 2024

(Agencies): Arunachal Pradesh Deputy Chief Minister Chowna Mein-i Nyishi Indigenous Art & Archive-Cum-Cultural Centre lapoktsüogo.

Iba Centre ya Nyishi Nyidung Mwnjwng Rallung (NNMR) ajanga yanglu aser Nyishi nunger sobaliba senmang kuli lir.

"Alima ainba mapang ka

nung lisopur sobaliba wazüka ayutsübaji kanga tongtipang. Asenoki tanü putu aser sobaliba tsüngda kasasa ayutsüla. Arunachal Pradesh nung lisopurtemi tanü loktiliba nung alemli sobaliba benshia aruba sayur" ta deputy CM Mein-i ashi.

Prime Minister Modi-i aniba India sorkari state ajak nung alemli sobalibatem kümzüka ayur. Arunachal Pradesh sorkari

oboula nunger nungi amanga aruba sobaliba senmang wazüker aser ajungketer" ta Chowna Mein-isa ashi.

Lisopur Nyibu (putirtem) lanuputu dang sobaliba sayua wazüka wazüka ayur. State sorkari scheme balala ajanga sobaliba reju pusema teyari agütsür, ta paisa metetdaksü.

NNMR-i iba cultural centre lapokba atema tenüngsang agütsür ta Mein-isa ashi.

2029 tashi nung Assam ya Rs. 10 lakh crore economy akümtsü

Guwahati, February 10, 2024

(Agencies): 2029 tashi nung Assam ya Rs. 10 lakh crore economy akümtsü alizüng lir ta Chief Minister Himanta Biswa Sarma-i ashi.

"Assam economy ya Rs. 10 lakh crore kümra asenoki linük rongzenketzüng wadang nung shilem tajung agitsü. Tang asenok Rs 5.67 lakh crore shi lir aser sangküm Rs 6.43 lakh crore akümtsü. 2029 tashi nung

Rs 10 lakh crore economy atongtsü onok sentong lir" ta CM Sarma-i ashi.

"Tang tashi nung Assam ya dependent state ka lir kechiyong asenok national average kübok lir. Asenoki national average atenba sülen contributory state ka akümtsü. Anungji 2029-30 tashi nung Assam-i national average tema akümtsü aser ibaji health, education, goods,

innovation, culture mesüra tang sector mashii ka nung asütsü" ta pai ashi.

"Asenoki kanga junga renlokdar aser tesüiba küm ishika tsüngda junga dang aruogo. Asen rongsenketzüng yamai dang küm pezü-pungu ka ora Assam ya contributory state ka akümtsü. Iba tetezüji Prime Minister Narendra Modi pungmang den kasa asütsü" ta CM Sarma-i ashi.

Assam police-i Hmar tsür ket nung drugs apuba atema pelar

Imphal, February 10, 2024

(Agencies): Assam police-i mozü shibelener ka apuba atema pelar ta Manipur chief minister N Biren Singh-i ashi.

"Assam police-i Hmar tsür ka ket nung heroin gram 700 bena lia apuba atema tenüngsang agütsür. Cachar district nung la ket nung sapon pongdang 50 nung Rs 5 crore

alang heroin bena lia apu" ta Biren-i ashi.

Manipur kübok Jiribam nungi tetsür ka ket nung Rs 5 crore alang heroin ben alia apu. Gari ka mita aodang la ket nung heroin 700 grams bena liasü. Iba tetsürla ya arishi küm 35 tain Nengcha Hmar ta jangjaogo. Osang tejangja ka

angazükba sülen police-i Lakhipur nung Manipur nungi aruba garitem soter reprangdang gari ka nung heroin bena aliba apu.

Iba dak sendakba nung Narcotics Drugs and Psychotropic Substances (NDPS) Act kübok ken o ka benokogo ta Assam police-i metetdaksü.



Mizoram Chief Minister Laldhuma-i New Delhi nung Union Home Minister Amit Shah den ajurutepdang agiba noksa angur. Iba mapang tenati Indo-Myanmar arrtsü atsü dangtsüba dena onük aika lemsatep aser refugee tebilemtsü atema jembii.

Netanyahu-i Rafah nungi nüburtem anintsü tetuyuba agütsüogo



Benjamin Netanyahu

Jerusalem, Tsüklai/February 10 (Agencies): Israel Ato Kilonser Benjamin Netanyahu-i, Hamas pur raktoktsü atema inyakyim atsülangshia mao tsüngda military dang Gaza kübok Rafah yimti nungi civilian tem anintsü atema renemtsü asoshi tetuyuba agütsüogo.

Gaza nung tanungba tesemtem nung Israel-i meita aoba sentong balala ayongzüka aoba mapang Rafah nung Palestine nung million 1.5 shi jenoka lir.

US-i, Rafah amakba ajanga timtem lendong tulu adoktsü ta Israel nem tekümdangtsü metetdaksüba den EU aser UN napronglai shisabulua bilemba lemsatepogo.

Teyari agütsüba lokti tentet balalai ashiba agi, yimti nungi nisung ajak anintsü tamakoktsü asütsü.

Netanyahu-i military aser security ketdangsürtem dang nüburtem anintsü aser Hamas pur samatsütsü atema sentong yanglur cabinet nem agütsütsü asoshi tetuyuba agütsüogo, ta pa indang office sangdong ka ajanga Hokolbarnü metetdaksü.

"Hamas pur ajunga mesamatsüi Rafah nung Hamas battalion pezü toktsüba ajanga rara indang nükjidong atongtsü tamakoktsü. Rafa amakba mapang nüburtem raraba tesem nungi anina atatsü kanga tongtibang lir," ta kasa sangdong

ajanga metetdaksü. Iba hopta tetenzüklen Netanyahu-i ashiba agi, pai sepaitem dang Rafah nung operation ka benoka inyaksü atema renemtsü asoshi tetuyuba agütsüogo aser Israel-i Hamas pur akoktsü atema ita ishika dang anunga lir.

Hamas puri ceasefire atema onüktem benokba magizükba mapang pai iba olen ya lemsatepa liasü. BBC dang osang ka ajanga ashiba agi, telok ana tsüngda sensaksem bangdaka ayuba sülen Hamas atema sensaksemertem Egypt yimtiba Cairo toktsür odar.

Rafah nung alirtem ya timba Gaza kübok tanga tesem balala nung raraba ajanga jenshia aoertem lir aser parnok süki nung litepar.

Gaza aser Egypt na sendakteptsü asoshi Rafah ya dang ajanga aoer.

Hokolbarnü EU diplomat Josep Borrell-i social media ajanga, "Israel military-i Rafah amaktsü ta osang angazükogo, koba shisabulutsüka lir. Iba ajanga timtem tekangshi aika adoktsü aser tang humanitarian tensa kanga mejungi aliba tali tamajungba kümdaktsütsü aser civilian tem aika taküm samatsü," ta ashi.

Iba hopta tetenzüklen UN Secretary General António Guterres-i, yimti nung meimchir temeden dak sendakba nung timtem tekangshi tulu adoktsü ta tekümdangtsü metetdaksüogo.

Pa otongdar Stéphane Dujarricia, "Rafah nung nüburtem tia jenjang atema onok kanga shisabulur. Nüburtem kümzüka ayutsüji kanga tongtibang, saka onoki nüburtem tashiyim agi pei talidak toktsür modaktsünür.

Kasa mapang nung Palestinian refugees, UNRWA indang tekolakbai ashiba agi, Rafah nung nüburtem mesüngjemteti kümogo aser tsübuteper.

"Rafah sülen koloni aotsü iba indang nüburtemi kecha memetet," ta Philippe Lazzarini-i Jerusalem nung osangbenertem dang ashi.

"Nüburtem aliba tesem nung military operation tulu benoka inyakra iba ajanga timtem tekangshi tali dang bendenloktsütsü," ta pai ashi.

Osang ajanga ashiba agi, Israel-i Hokolbarnü Gaza amakba mapang Rafah nung nisung ti densema nisung 15 tepsetogo, ta Hamas indang health ministry-i ashi. Iba dak sendakba nung Israel-i kecha osang magütsü.

Tanur ana tetsü Garda al-Kourid, shiba rara mapang trokben tashi tesem meleshia lidar, lai ashiba agi, Israel-i iba yimti amaktsü imladar, ajisüaka iba ya matalok tsüngda ceasefire ka atema mulungteptsü imla atar.

"Parnok Rafah-i arura aji onok asoshi tatembang asütsü aser onok asütsü atatepba ama dang lir. Onok taolen mali," ta lai BBC dang ashi.

Brehostibarnü Rafah metetshi-i US Tir Joe Biden-i Gaza nung Israel nung inyakyim ya kanga alia lir, ta ashi.

US National Security Council otongdar John Kirby-i ashiba agi, Israel nung er sepaitemi tesem balala amakba mapang nüburtem kümzüka toktsütsüji parnok khuret lir.

Iba rara nung tang tashi nung Palestine nung 27,900 dak tema süogo aser nisung 67,000 yirur lir.

Molungnen O



1938- 4.2.2024

Onoki teti akümtsübuwa aser meima aliba temeim Ojala **Late Temsujungla Aier (Süngratsü)**, la ajungbena iba akumli wadang tembanger ogo.

Kija, kibong aser lokti shirnokisa nübo, rongsen aser sarasadem den maparen balala ajak nung nungtia yaritepogo, nenok ajak dang kanga pelar.

Onoki nenok temeim mapatem kodanga mamatdoksü. Tsüngremi nenok ajak moajangni ta aji ozü sarasadem.

Temeim Jalatem, Semchirtem, Kinungertem & Anükapang

Russia-i Kharkiv amak; nisung 7 süogo

Kyiv, Tsüklai/February 10 (Agencies): Russia-i drone amshia manger mesangwa tsüngda Kharkiv yimti amakba sülen tanur asem densema nisung tenet tashi tepsetogo, ta ketdangsürtemi metetdaksü.

Regional Governor Oleg Synegubov-i Honibarnü Telegram ajanga ashiba agi, Russia nung drone temi ki 15 tashi amakba sülen asürtem rongnung arishi küm tenet, pezü aser ita trok tanur asem densema liasü.

Kharkiv ya Russia aser Ukraine na arrtsü nungi km30 shi pilar lir aser rara tenzüka sülen iba yimti ya Russia nungertemi aiben maka arudar.

January 23 nü Kharkiv aser Ukraine nung yimti ana missile agi kanga mejungi maka liasü, koba taküm yimtitem nung missile timtiba khaloktsüba liasü. Iba mapang nisung 15 asü aser ki 222 nung kichiba 5,000 shi bomb apokba aser shockwave agi raksaja liasü, ta ketdangsürtemi ashi.

Rara metenzük tsüngda iba yimti nung nütsünyongsük

million 1.5 liasü aser iba yimti ya Ukraine nung yimtitem rongnung ajak dang lendong tamajungtiba ajuruba yimta ka lir. Russia ya iba yimti anütok aser anütoklen tip nung lir aser Moscow-i atsünger aliba Luhansk region nungi km150 shi dang pilar lir.

2022 küm February ita nungi rara tenzüka sülen Russia nung er sepaitemi Kharkiv yimti atsüngtsü meranga aruogo aser yimti tiyongtsüi dena Russia nung er sepaitem yokogo.

Moscow-i strategic bombers, ballistic mesüra cruise missile tem aser Iran o Russia nung yangluba drone tem yokogo, koba arrtsü nungi minute asem nung iba yimti tonga aoer.

Linük yimtiba Kyiv nungbo anüolen aliba linüktem indang air defence systems yakta amenoka liasü, ajisüaka Kharkiv nungbo iba amala defence system mali. Anungji iba yimti nung alirtem aser ketdangsürtemi nisung taküm samaba nungi jenboa alitsü atema takaratiba nung jenjang agitsüsa akümer.

Senegal: Election thinenba ajanga mangatettep prokshi aoer

Dakar, Tsüklai/February 10 (Agencies):Tir election thinenba atema Senegal nung nüburtemi kanga sashia longka ait tenzüka ya linük ajungai prokshia ogo aser lendong nung nisung asüba osang tang mezüngbuba sangdongogo.

Saint-Louis yimti nung Hokolbarnü police tem den mangatettep adokba mapang kaketshir ka asü, ta opposition lenir ka aser local hospital source ka ajanga metetdaksü.

Linük yimtiba Dakar nung security forces-i nüburtem senshidaktsütsü atema tear gas khaloktsü aser stun grenade tem amshia liasü.

February 25 nü agitsü aliba election ya taoba hopta MP temi December 15 nü tashi thinentüsü. Tir Macky Sall-i election ya

mapang telatet ka makai thinenba atatsü asoshi ayongzük aser ashiba agi, Tir candidate eligibility dak sendakba nung mangatettep aliba bentettsü atema iba ya nüngdaka kümogo.

Ozüng yanglurtemi Sall-i ayongzükba agizüka ita 10 tashi atsülangtsüogo.

Iba inyakyim anemertemi, iba jenjang agiba ajanga Senegal koba tamendakdak takangka maliba West Africa tesem nung democracy tamendakdak ama züngshir, iba jenjang ya raksatsü, ta tekümdangtsü metetdaksüogo.

Opposition lenir Khalifa Sall, shiba Tir den sendaktepa mali, pai taoba mapang election thinenba ya "constitutional coup" ka lir ta shiogo.

Saint-Louis nung kaketshir ka asüba osang ya Khalifa Sall-

i social media nung sangdong ka ajanga metetdaksü.

Kaketshir ka asüba osang ya local hospital source ka aser university ketdangsür katia jangjashitsüogo.

Iba longkak aitba sentong ya taoba hopta tatemi tenzük. Hokolbarnü Dakar nung longkak aitertem aser security forces na mangatettep adok aser longkak aitertemi tyre arongba den security force dak long agi ona liasü.

Tir Sall-i pa election nung tanaben tokteptsü asoshi kecha tebilemba mali ta shiogo, saka pai takokba tashi Tir mapa bena atatsü mesüra pa melener pai aginüba ama inyaksangshidaktsütsü merangba atema critic temi pa aitsüogo.



Jakarta nung election atema nüboyimtsü asoshi tatebangbuba anogo Indonesia Defence Minister aser presidential candidate Prabowo Subianto Gibran aser Rakabuming Raka na pusemertem aika adenshia aliba noksa nung angur.

Mokokchung Inter-ward March 12 nungi asayatsü



5 buba Mokokchung Inter-Ward Football Tournament 2024 dak sentakba nung osangbener senden ka akadang tayonger Marepkong Youth Association ketdangsürtem noksa nung angur.

Mokokchung, 10th Feb (TYO): Mokokchung town nüburtemi yongya ataba 5 buba Mokokchung Inter-Ward Football Tournament 2024 taruba March ita 12-23 asayatsü teletetba agiogo, ta Feb 10 nü tayonger Marepkong Youth Association ketdangsürtemi Marepkong Community Hall nung osangbenertem den jembidang metetdaksü.

Tejangrar ward-tem asoshi form agütsüba aser meyiptsüba maparenji 19th Feb nungi 2nd March, 2024 tashi alitsü aser form-ji Mokokchung MMC Complex Cyber 48 nung angutsü.

Taküm küm nungi Mokokchung Inter-ward football tournament tamaitüsü (logo) aser omen tasen amshitsü asoshi sayaogo. Omenji "rise as one" lir. Team kari danga tola (jersey) nung tournament logo keta yanglunüra tayonger nungi temelaba agir amshitetsü, ta parnoki shiogo. Logo nung tamaitüsü balala keta lir aser itemji - Mokokchung nungi petinu ama asayar tajung adokdaksütsü, telungjem, yimjung, teputep aser ochi

tamaitüsü lir, ta parnokisa metetdaksü.

Mokokchung town ward 18 sangeri nübu, rongsen, shisatsü agi nungitta yariba ajanga iba asayamung küm 4 tashi takok manung ayonga aruogo, maneni shilem tajung agidaksünür, ta Organizing Committee Convener, Bendangnükshi-i mepishia ayongzük.

Mokokchung town nüburtem asoshi iba asayamung ya tongtibang ta bilemer, iba janga taoba mapang ama iba yimti nungi footballer jenti adoktsü aser iba ajanga yimti nüburtem lungjema alitsü nükjidong yur iba asayamung ya ayonga arur, anungji, tangatetba nung shilem agitsü renema lidaksünür, ta paisa ashi.

Mapang ka Mokokchung ya tangar dang alakteta football asayar adokdak tesem ka liasü, saka tanü ibaji samaogo, anungji, iba asayamung ajanga taoba mapang ama tanaben shilua arudaksütsü tejangraba lir, ta paisa shisem.

Osang tajung kaji sempet aketerem lanurtem nem sabang lapoktsütsü nükjidong nung Guwahati nung aliba football academy ka den tang tejembidak lir, lenmang junga

ngutetra parnok den tenangzüktepba kar yanglutsü tebilemba lir aser iba ajanga lanurtem nem maangka lapoktsütsü imlar, ta Convener-isa metetdaksü.

Ibai Mokokchung town nung alir talisa football janrartem ajungshitsü asoshi ayongba asayamung ka lir. Tangalen nungi asayartem anir arua asayatsü kheni memelar. Tajung kaji iba asayamung nung ticket ayokba nungi aruba tajangzükji tayonger o shilem agir teloktem kasasa alemer.

Iba asayamung shir ward-i bendir parnok nem senpet sen 50,000/- den trophy aser certificate, aser atongdakba nem 30,000/- den trophy aser certificate agi senpettsü. Iba den nija senpet - Best Goalkeeper, highest scorer, best defender aser player of the tournament-tem shima senpettsütsü, ta parnoki shiogo.

Tang tashi nung mezüngbuba Mokokchung Inter-Ward Football Tournament-ji Arkong Ward-i aben, tanabubaji Artang Ward, tasembubaji Mongsenbai Ward aser pezububaji Sangtemla Ward-i bena lir. Taküm pungububaji shibai abentsüar mapangi bener arutsütsü.

Dart Tournament: Burakum & Vikepelhou na Nagaland tenüng nung asayatsü



Dimapur, Tsüklai/February 10 (TYO): 6buba National Masters Game koba Goa nung asayatsü lir, iba asayamung

nung Burakum Ao aser Vikepelhou Dzuwichü na Nagaland tenüng nungi asayatsü.

Tena iba asayamung 40+ tarep asaya nung shilem agitsü aser Burakum Ao 40+ kija asaya nunga shilem agitsü.

Tang mezüngbuba Nagaland nungi asayartem National Masters Game nung Dart asaya nung asayatsü.

Iba asayamung nung Dart asaya ya February 11 nü asayatsü.

Tenaprongla ya Nagaland 40+ football team nunga densema lir.

China nung Argentina indang asaya ana thitsü

Tsüklai/February 10, 2024 (Agencies): Inter Miami pur Hong Kong nung asayaba mapang Lionel Messi masayaba sülen China nung ketdangsürtemi Argentina team China nung friendly ana asayatsü aliba thitsüogo.

World champion team ya March ita Hangzhou nung Nigeria aser Beijing nung Ivory Coast den asayatsü liasü.

Deobarnü Hong Kong XI den Inter Miami pur asayaba mapang Argentina captain ya masayaba atema China nung

fan tem kanga mepelar.

Arishi küm 36 tain Messi-i ashiba agi, pa groin yiruba ajanga masayatetsüsa aküm.

Ajisüaka anogo asem lir pa Japan nung Vissel Kobe den asayaba mapangbo asayaba atema China nung pa kanga mejungi aitsüogo.

"Beijing-i tangbo Lionel Messi asayatsü aliba asaya ayongzüka masayaner," ta Beijing Football Association-i Honibarnü metetdaksü.

Hokolbarnü Hangzhou nung asayatsü aliba asaya thitsüba

mapang sports bureau-i ashiba agi, "ajaki meteta aliba kuli dak ajemdaker iba asaya ayongzüka asayatsü atema tensa tapet masü."

Messi masayaba sülen Hong Kong nung fan temi Inter Miami co-owner David Beckham anema yimyim ayim tenzük aser parnok indang ticket sen meyipa agütsütsü takhangba agüja liasü.

Iba sülen asaya ayonger Tatler Asia-i parnok indang ticket sen shilem 50 meyipa agütsütsü tenangzükba agütsüogo.

England den tanungba Test asemnung Kohli masayatsü

New Delhi, Tsüklai/February 10 (Agencies): England den tanungba Test asaya atema national selector temi Honibarnü asayartem sangdong mapang imla aliba ama taoba India captain Virat Kohli team nung züngoksema mali.

Kohli mezüngbuba Test ana nunga masaya aser pa jurila maparen kar aliba ajanga tanungba asayatem nung shilem magitetsüsa kümogo.


"Virat kohli jurila maparen kar aliba ajanga asayamung nung tanungba asayatem nung shilem magitetsü. Board-i Kohli teletetba akümtsübur aser pusemer," ta BCCI-i sangdong ka ajanga metetdaksü.

National selection committee-i asayar tejen Ravindra Jadeja aser KL Rahul na team nung züngoksemogo, ajisüaka tena BCCI indang medical team-i temelaba agütsütsü nüngdaker. Asayar anapornla ya yirur temang anepaluba mapang ka lir. Jadeja hamstring yiru aser Rahul-a quadriceps tachichilen timtem tilaka lir.

"Ravindra Jadeja aser KL Rahul na ya BCCI medical team-i temelaba agütsü nungdang asayatetsü," ta BCCI-isa metetdaksü.

Ajisüaka asayar tejen Shreyas Iyer, shiba groin aser teberem yiruba ajanga team nung mezüngoksem, pa yiruba indang osang tejangja BCCI-i magütsü.

Osang ajanga ashiba agi, Iyer ya yiruba agi dang masü saka team nung meshimtsü



Virat Kohli

atema teletetba agir liasü.

Asayar 17 agi kümтетba squad nung asayar tasen ka dang lir. Bengal nungi fast bowler Akash Deep-i first-class cricket aser tawa India A vs England Lions Test series nung kanga junga asayaogo aser ibayongji pa team nung anikogogo.

Jadeja meyipa aruba ajanga left-arm spinner Saurabh Kumar toktsüogo aser pacer Mohammed Siraj-i Avesh Khan melenogo. Siraj züngoksema ajanga pace bowling department tashi taitba kümdaksütsü.

Linük ana tsüngda Test pongu asayatsü lir aser tang tashi nung team anapronglai asaya kaka koker lir.

India Squad: Rohit Sharma (c), Jasprit Bumrah (vc), Yashasvi Jaiswal, Shubman Gill, KL Rahul*, Rajat Patidar, Sarfaraz Khan, Dhruv Jurel (wk), KS Bharat (wk), R Ashwin, Ravindra Jadeja*, Axar Patel, Washington Sundar, Kuldeep Yadav, Mohd. Siraj, Mukesh Kumar, Akash Deep.

Stadium tasen yanglutsü atema AC Milan-i ali aliogo

Tsüklai/February 10, 2024 (Agencies): AC Milan-i San Siro toktsür aotsü atema jenjang tasen ka agia stadium tasen ka yanglutsü asoshi ali aliogo, ta ken o jangja alir kati Hokolbarnü metetdaksü.

AC Milan pur tang San Siro Stadium ya yimti club Inter Milan den lemsatapa amshia arudar.

AC Milan-i tang yimti southeast len San Siro nungi km 15 shi pilar San Donato municipality nung ali 256,000 square metre alizükogo.

Italian press sangdong ajanga ashiba agi, San Donato municipality aser iba tesem nung alirtem den sensaksem tenzükogo aser taruba hopta tembanga sensak asemtsü imlar, kong building permit dena angutsü akok.

Taoba küm September ita AC Milan-i, 70,000-seater stadium ka San Donato nung yanglutsü atema repringoka lir

ta sangdong, ajisüaka koba mapang tashi nung iba stadium yanglua lapoktsü iba indang osang magütsü.

San Siro indang official tenüng ya Giuseppe-Meazza Stadium lir. 80,000-seater stadium ya 1926 küm yanglua liasü aser 1990 World Cup nung yanglushiogo, ajisüaka iba ajanga club tem tenüngdakba meperidaksür

Club anapronglai San Siro ya bener stadium tasen ka yanglunüa liasü, koba club anaprongla lemsatapa amshitsü, kong sports, entertainment, aser shopping asütsü asoshi tesemtem alitsü.

Ajisüaka ketdangsürtemi yimti meyong San Siro ya yimti sobaliba dak sendaka lir ta ashiba sülen iba tebilemba ya matalok.

2026 küm San Siro nung Milan-Cortina d'Ampezzo Winter Olympics lapokba sentong agitsü.

BILEMDANGANG

"Langka tasen angazüktsü atema temonu mali."